

**Kommuunit piffinni pinaveersaartitsinermut immikkoortumi anguniagaannut ikorfartuisussanik, Peqqissaanermik Ilinniarfiup ataani pinaveersaartitsinermik siunnersortitut ilinniartitaanermik pilersitsinissamik Naalakkersuisut peqquneqarnissaannik Inatsisartut aalajangiiffigisassaattut siunnersuut.**

(Inatsisartunut ilaasortaq Agathe Fontain, Inuit Ataqatigiit)

**Akissuteqaat**

(Ilinniartitaanermut, Kultureqarnermut, Timersornermut Ilageeqarnermullu Naalakkersuisoq)

**Siullermeerneqarnera**

Aallaqqaasiutigalugu Inatsisartunut ilaasortaq Agathe Fontain, Inuit Ataqatigiit, aalajangiiffigisassatut siunnersuutaanut Naalakkersuisut sinnerlugit qujassuteqarfigisavara.

Naalakkersuisut siunnersuuteqartup katsorsaannermut sanilliullugu pinaveersaartitsinerup pitsaaneruneranik oqaaseqarnera isumaqatigivaat. Suliniutit tassungarpiaq sammiveqartup ukkatarissavagut. Anguniakkavut assigiipput, tassalu Nunatsinni innuttaasut tamarmik, meeqqat, inuusuttut inersimasullu peqqissuunerisa ajunngitsumillu inuuneqarnerisa pitsaanerulersinneqarnissaat. Tamanna Naalakkersuisuniit pingaartinneqarlunilu salliutinneqarpoq.

Tamanna anguneqassappat suut atorneqassanersut immitsinnut aperisinnaasariaqarput. Taamaaliorsimavugullu. Pinaveersaartitsinermik tunngaveqarluni suliniutit peqqinnerulersitsiniarnermilluunniit tunngaveqarluni suliniutit assigiinngissuseqarput.

Naalakkersuisut Inuuneritta III-mi 2030-p tungaanut atuuttumi nassuiaatigineqartut malillugit ilisimatuussutsikkut uppersarsakkanik toqqammaveqartumik peqqinnerulersitsiniarluni suliniuteqartoqarnissaa aalajangersimavaat. Taamungaannaq toqqagaangilaq, Inuuneritta II-mi aamma I-mi peqqinnerulersitsiniarluni suliniuteqarsimanermit misilittakkat tassani tunngavigalugit aalajangiisoqarsimavoq.

Peqqissutsitigut atukkatigullu pitsaasumik allannguisoqarnissaanik anguniagaqarnerup qanoq anguneqarnissaanut nukiit periarfissallu pitsaanerpaamik ukkatarineqarnerisigut aamma inuit inuunerminni ataqatigiissumik isumalimmillu misigisaqartinneqartarnerisigut pissaq.

2006/2007-imi pinaveersaartitsinermik siunnersortitut ilinniagaqartarnissap aallarteqqinneqarnissaanut atatillugu § 37 naapertorlugu apeqquteqartoqarmat tamanna suliarisimavarput. Taamanikkut akissutigaarput, taamatut ilinniartitaanissaq pisariaqanngitsoq. Kommunit pinaveersaartitsinermi assigiinngitsunik politikkeqarput, taamaammat immaqqa suliatigut assigiinngitsunik piginnaasallit amerlanerit najukkani pinaveersaartitsilluni suliaqartarnermut ikiuussinnaanerat pingaaruteqarsinnaavoq. Pingaaruteqarporli erseqqissaassutigissallugu, Naalakkersuisut kissaatigimmassuk pineqartumut atatillugu suliamik siuarsaasoqarnissaa aamma kommunit Inuuneritta III-mi tunngaviit malillugit peqqinnerulersitsiniarluni suliniuteqarnermut ikiuussinnaanerat.

Taamaammat Naalakkersuisut allannguutissatut imaattumik siunnersuuteqarput:

Kommuunit piffinni pinaveersaartitsinermut immikkoortumi anguniagaannut ikorfartuisussanik, Peqqissaanermik Ilinniarfik suleqatigalugu pinaveersaartitsinermik

siunnersortitut ilinniartitaanermik pilersitsinissamik Naalakkersuisut peqquneqarnissaannik  
Inatsisartut aalajangiiffigisassaattut siunnersuut.